

■ Sforren ondoren ere nazioarteko indarrak egongo dira

IPAR ATLANTIKOKO Tratatuen Erakundea (NATO) osatzen duten 16 herrialdeek atzo behin-behinekoz erabaki zuten nazioarteko indarrak egongo direla Bosnian ekainaren 30etik aurrera. Egun horretan amaituko da Egonkortasunerako Indarren (Sfor) egonaldia. Indar berrien izena ere Sfor izango da, eta 34.000 lagun inguruk osatuko dute. Hurrengo urratsa izango da Sforretan parte hartzen ari diren herrialdeek -30etik gora dira- onartzea erabakia. X

K O N G O K O
E R R E P U B L I K A
D E M O K R A T I K O A

■ Etienne Tsisekedi oposizioko burua hiriburutik kanporatu du Gobernuak

LAURENT-DESIRE KABILA lehendakariak hiriburutik kanporatu du Etienne Tsisekedi oposizioko burua, ekitaldirik ez egiteko alderdi politikoek duten debekua bortxatzeagatik. Herenegun gauean Kabilak aitortu zuen Mendebaldeko Kasai probintziako Kabeya-Kamwanga jaioterrira bidali duela Tsisekedi. Giza eskubideen egoeraz ardurtzen den Nazio Batuetako ordezkariak salatu egin zuen herrialdeak duen egoera. X

I N D I A

■ Bozketa berriro egingo da 599 hautes-lekutan

JOAN den igandean egin ziren hauteskundeak berriro egingo dira 599 hautes-lekutan. Hauteskunde Batzordeak aginduta. Hautes-leku horietan bortizkeria ekintzak izan ziren; 27 pertsona hil zituzten, hauteskontziak ostu egin zituzten eta bestelako irregularitasunak izan ziren. Hilketa gehienak iparraldeko Bihar estatuan gertatu ziren, baina Hauteskunde Batzordeak ez du erabaki zenbat hauteslekutan egingo den bozketa. X



EUSKO JAURLARITZA
GOBIERNO VASCO

Kultura Sailak diruz lagundutako egunkaria

Dublingo epaitegia aztertzen ari da Sinn Feinek aurkeztutako errekurtsioa


Alderdia eta IRA lotzen dituen «ebidentziarik» ez dagoela esan du Adamsek

Dublingo epaitegia aztertzen ari da Sinn Fein alderdi errepublikanoak Ipar Irlandako bake elkarrizketetatik kanporatzearen aurka aurkeztutako errekurtsioa. Gerry Adam Sinn Feineko buruzagiak «bidegabetzat» jo du Gobernu britainiarrak egindako eskaera.

Agentziak/ Dublin

SINN FEINEK herenegun iluntzean aurkeztu zuen errekurtsioa Dublingo epaitegian, eta epaitegia errekurtsioa aztertzen arituzen atzo. Arratsaldean aztertu zuen auzia epaitegiak, gaiari lotuta dauden alde guztien irizkiak entzun nahi baitzituen Frederick Morris epaileak. Sinn Feinek ez du baztertu errekurtsioa Londresen ere aurkezteaz.

Gobernu britainiarrak joan den astelehenean eskatu zuen alderdi errepublikanoak bake elkarrizketetatik kanporatzeko. Joan den astean Belfasten gertatutako hilketak Irlandar Armada Errepublikanoak (IRA) egin zituela argudiatu zuen Londresek. Brendan Campbell droga trafikatzailerik eta Robert Dougan Ulsterren Askapenaren Aldeko Bortxakariak (UFF) talde paramilitar loyalistak kidearen hilketan IRAk parte hartu zuela ziurtatzeko lain frogatzen badagoela esan zuen Royal Ulster Constabulary (RUC), Ipar Irlandako Polizia bereziak. Eta Sinn Feinek, IRAren adar politikoa izaki, bake elkarrizketen araudiak urratu ditu.



Gerry Adams, herenegun, Dublingo gaztelura sartzen.

JOHN GILES / EPA

Sinn Feinek «bidegabetzat» jo zuen erabakia. Gerry Adams Sinn Feineko buruzagiak Dublingo gaztelura sartzean esan zuen Gobernu britainiarrak eta Irlandakoak ez dutela eskubiderik alderdi errepublikanoaren ordezkariak kanporatzeko. Sinn Fein eta IRA lotzen dituen «ebidentziarik» ez dagoela gaineratu zuen Adamsek. «Akusazioak bidegabeak dira erabat, gure aurkakoak, alderdi politiko gisa gure zintotasunaren aurkakoak dira; baina batez ere bakea lortzeko ahaleginen eta gure hautesleen

zintotasunaren aurkakoak dira».

Kanporatzea, atzeratua • Sinn Fein elkarrizketetatik kanporatzeko agindua atzeratzea litekeena dela adierazi zuen David Andrewsek, Irlandako Atzerri ministroak. «Legezko prozeduren emaitzen zain egongo gara. Azken hiru egunak bereziki zailak izan dira», zehaztu zuen.

Sinn Fein kanporatzen badute ere hemendik aste gutxira berriro onartuko dute elkarrizketen mahaiari. Baina adituen hitzetan, baliteke epe horretan Irlandar

Armada Errepublikanoak su-etena haustea.

Sinn Fein erretira dezaten unionistek egindako eskaera eztabaidatu zuten Dublingo gazteluan atzoko bake elkarrizketen saioan. Gaurtik aurrera elkarrizketak berriro Stormont jauregian, Belfast kanpoaldean, izango dira.

Bestalde, Douganen hilketatik kartzelaratu zituzten lau gizonen Long Kesheko preso errepublikanoen modulura eramateko eskatu dute. Laurei leporatu diete Dougan hiltzea, baina ez IRAko kide izatea. X

Sierra Leonan bahitutako fraile nafarra ondo dago, eta hura askatzea negoziatzen ari da gotzain bat

■ Boterea galdu duen Batzorde Militarreko gerrillariak bahitu zituzten Garaioa eta beste lau europar

Agentziak/ Freetown

JOAN den larunbatean bahitu zutenetik aurreneko aldiz, atzo izan zen Jose Luis Garaioa misiolari nafarraren eta harekin harrapatutako beste lau europarren berri. Hain zuzen ere, bostak ondo daudela jakin zen eta Makeny-ko gotzaina, Giorgio Biguzzi haien askapena negoziatzen ari dela Fronte Iraultzaile Batuekin (RUF).

Jose Luis Garaioa Agustinoen ordenako fraile nafarra, Fernando Aguilo misiolari espainiarra, Gilberto Ugolini italiarra, Joseph Erhard austriarra eta Antonio Mateu farmazialari espainiarra Lusargo ospitalean bahitu zituzten larunbatean, Sierra Leonako Mikale Koroma eta Kamerungo Linus Diyvikuyyekin batera. Mikale Koromak ihes egitea lortu zuen, eta, atzo misio batera iritsi ostean jakinarazi zuen bahituta-

ko sei lagunak ondo daudela eta RUFeko gerrillariak izan zirela bahitzaileak. Oso litekeena da, Makenyko gotzainaren bitartekaritzari esker bahitutako bost lagunak ECOMOG indarretako soldaduek preso hartutako Fronte Iraultzaile Batuko kideen truke aske uztea.

Sierra Leonan gerra giroa bizi dute aspalditik, baina joan den astean larritu egin zen. Izan ere, Afrika Mendebaldeko Herrialdeen Elkarteko Ekonomikoko (ECOMOG) interposizioko indarrek iazko maiatzean estatu kolpea eman zuen Batzorde Militarra garaitzea lortu zuten ostegunean. John Paul Koromak gidatzen zuen Batzorde militar hori, eta RUFeko gerrillarien laguntza zuen.

Hala ere, ez dutela etsiko eta borrokan segituko dutela jakinarazi du Batzorde Militarra. Ildo horretatik, Sierra Leonako hego-

ekialdean eraso ugari egin zituzten Batzorde Militarreko kideek eta RUFeko gerrillariak herenegun, eta Bo hiria berenganatzea lortu zuten Kamajors gerrillariak garaitu ondoren. Freetown hiriburuan ondoren, Sierra Leonako hiririk garrantzitsuenak da Bo. Kamajorseko gerrillariak sierra leonarrak dira, baina ECOMOGeko soldaduen alde egin dute borroka gatazka honetan.

Bitartean, ECOMOGeko indarrak Tejan Kabbaj lehendakari ohiaren itzulera ari dira prestatzen. Tejan Kabbaj hauteskunde bidez aukeratu zuen lehendakari 1996 urtean. Johnny Koromak joan den udaberrian estatu kolpea eman zuenean, adierazi zuen herrialdea gidatzeko gai ez zela erakutsi zuela Kabbajek eta horregatik erabaki zutela boterea indarrez hartzea.

Nolanahi dela, Sierra Leonako mugak gainditu ditu gatazka

horrek: Nigeria izan da ECOMOGeko indarren bidez Batzorde Militarra garaitzea lortu duena. Liberiak, berriz, Batzorde Militar hori eta Fronte Iraultzaile Batuko gerrillariak lagundu die. X